



NEWSPAPER CLIPPING

Date : 06 Disember 2018
Title : Universiti perlu jana pendapatan sendiri
Publication : Berita Harian
Page : 54

Universiti perlu jana pendapatan sendiri

➔ Antara usaha bantu penuntut daripada keluarga kurang mampu

Oleh Nas Norziela Nasbah
nasnorziela@bh.com.my

■ Bangi

Pengurusan universiti di negara ini perlu memastikan institusi itu bukan sahaja berupaya melahirkan graduan bermutu tinggi tetapi pada masa sama, mampu menjana pendapatan sendiri untuk kekal relevan seterusnya berkembang ke peringkat global.

Timbalan Menteri Kewangan, Datuk Amiruddin Hamzah, berkata pihak universiti perlu mengambil inisiatif untuk menjana pendapatan terutama bagi menampung perbelanjaan pelajar daripada keluarga kurang berkemampuan sepanjang pengajian.

Beliau berkata, pengurusan universiti seharusnya tidak lagi bergantung kepada kerajaan bagi menampung penajaan pelajar di universiti masing-masing.

"Pelbagai usaha dan inisiatif boleh diambil oleh pihak univer-

siti dengan memikirkan cara terbaik untuk menghasilkan pendapatan melalui pelbagai aktiviti.

"Antara usaha yang dilihat adalah dengan menubuhkan yayasan di universiti masing-masing bagi tujuan itu (menjana pendapatan)," katanya ketika berucap pada Majlis Persidangan Pengurusan Dana Sumbangan, Zakat dan Waqaf 2018 di sini, semalam.

Yang turut hadir, Naib Canselor Universiti Tenaga Nasional (UNITEN), Datuk Prof Ir Dr Kamal Nasharuddin Mustapha dan Pengarah Yayasan Canselor UNITEN, Mohamad Ishak Mohamad Ibrahim.

Pengurusan dana

Persidangan dua hari anjuran Yayasan Canselor UNITEN itu berlangsung di sebuah hotel di sini, bagi membincangkan pelbagai isu berkaitan terutama pengurusan dana dan sumbangan.

Persidangan itu turut menampilkan beberapa pakar, antaranya Pengerusi Yayasan Seri Harmoni, Tan Sri Dr Ghauth Jasmon dan Rektor Kolej Universiti Islam Antarabangsa Selangor (KUIS), Prof Datuk Dr Ab Halim Tamuri.

Mengulas lanjut mengenai persidangan itu, Amiruddin berkata, cabaran yang dihadapi



Amiruddin (tengah) merasmikan persidangan Pengurusan Dana Sumbangan Zakat dan Waqaf 2018, sambil disaksikan DR Kamal (kanan) dan Mohamad Ishak di Bangi, Semalam.

oleh sesebuah yayasan adalah mengurus dan mengumpul dana serta sumbangan orang ramai kerana ia bukanlah satu perkara mudah.

"Saya yakin dan percaya kebanyakan universiti termasuk UNITEN berjaya mengenal pasti mekanisme berkesan untuk

menjana pendapatan termasuk melalui sumbangan dan dana untuk mencapai keberhasilan," katanya.

Sementara itu, Prof Kamal berkata, selain pertukaran idea strategi perancangan menangani isu kritikal, persidangan masuk tahun kedua itu turut

mengenal pasti keberkesanan kaedah baharu yang efektif.

"Pihak UNITEN melalui Yayasan Canselor UNITEN juga ingin meningkatkan kefahaman pelajar dan pihak luar mengenai model sumbangan serta dana pelaburan yang ada berdasarkan cabaran semasa," katanya.